

の七十七

正白旗滿名臣傳

漢軍

卷二

三十七



八旗通志初集卷之一百七十七

名臣列傳三十七

正白旗漢軍世職大臣二

孫思克

徐治都

馬寧

楊宗仁



孫思克。漢軍正白旗人。其先世居廣寧。順治六年。授二等護衛。八年。任牛录章京。兼刑部理事官。十一年。陞甲喇章京。仍兼理事官。加夸蘭大。隨大軍征湖南。滇黔。得頭等功牌。康熙二年。授甘肅總兵官。都督僉事。是時西海厄魯特蒙古。咸駐牧黃城兒。大草灘。大黃山一帶。延至周道。居民時遭蹂躪。商賈亦患之。思克至。分別內外疆界。驅令遠徙。遂不敢近。灤卜台吉克代等。禦人於野。思克遣兵捕獲。奏請立斬。以狗海番宰。

僧哈兒等逞其驕悍。領數百騎。從寧遠堡之古溝口。越邊過北。思克率兵追擊。生擒其衆。請旨正法。自是蕃人膽悸。不敢南牧。思克以巖疆重地。鎮

標中左右三營。不敷策應。與提督張勇會疏。題准。增設前後二營。又永固城永昌。改設副將。金塔寺嘉峪關山丹高古城。俱改設遊擊。增設各營堡官兵。四年。移駐涼州。十三年五月。加右都督。是年逆藩吳三桂反。全秦煽動。平涼提督王輔臣叛。應之。臨洮蘭州失守。思克枕戈擐甲。秣

馬厲兵。誓圖滅賊。時提督張勇。西寧總兵官王進寶。從暑伏橋渡河。攻圍蘭州。思克從蘆塘渡河。攻靖遠衛。師抵城下。示諭禍福。城中老幼爭先投誠。遂復靖遠。十四年二月。加左都督。思克以固原等處未靖。擬整旅東征。以收全效。而甘屬紅崖地方。被噶爾丹部番麥力幹。亂手子。與攘卜揀漢。糾合番目葉賽等。乘隙入內。大肆搶掠。賊番阿喇奈。復肆狂悖。永固城副將陳某。戰歿於陣。河西一帶告急。思克率兵馳赴甘州。救

援賊番驚遁。復統兵渡河。同提督張勇總兵官
王進寶攻取蘭州鞏昌。適秦州逆賊巴三綱糾
川賊猖獗肆出。定西大將軍多羅貝勒董額檄
調思克赴援。川賊夜遁。城中逆孽知思克兵至。
遂出降。多羅貝勒憤秦川負固日久。欲屠之。思
克念其迫於賊勢。力言不可。嚴飭兵弁。秋毫勿
犯。復選精騎追勦川賊。西河禮縣漸次恢復。乃
同滿洲將軍穆占回鞏昌。多方招撫。脅從逆黨
無不傾心投順。於是臨洮蘭州平。惟王輔臣尚
負固平涼。思克率兵由西路進勦。師至紅寺兒
地方。僞總兵李國梁據險拒敵。思克撲勦賊衆。
生擒^僞守備等。獲僞劊器械馬匹。靜寧隆德諸州
縣悉定。師過六盤山。大雨如注。士不宿飽。攀崖
陟峻。賈勇前進。賊見之莫敢撓鋒。僞叅將江會
陞率衆降。抵卧羊山。僞總兵高鼎亦率僞官及
馬步兵千餘迎降。乃北至平涼。與大兵合圍。十
五年五月。隨撫遠大將軍圖海踏勘平涼城北
形勢。商畧克取機宜。攻虎山墩。率將士鼓勇當

先。臂受刀傷。深入寸許。血漬衣甲。猶奮不顧身。所向無敵。賊衆大敗。輔臣勢窮乃降。凱旋陞涼州提督總兵官。給一等阿達哈哈番世職。思克具疏乞休。弗允。十六年七月。敘功。授三等阿思哈尼哈番。十八年。又以疾乞休。弗允。隨大兵進四川。勦賊。因河西邊地要緊。

聖祖仁皇帝特令領所屬官兵回汛鎮守。甫抵涼州。復奉

命移駐莊浪。彈壓兩河。駐莊浪二載。時有慶陽逆首耿

飛。率衆倡亂。又西番打兒架祝囊。攻困河州。撒喇蘇直地方。遣官兵合勦。次第削平。二十二年五月。緣事。削阿思哈尼哈番及提督銜。以都督僉事管甘肅總兵官事。二十三年六月。事白。進左都督。兼充陝西甘肅提督總兵官。二十八年。有從北套逃來生番。憇頓擺代。帶領部落。乘夜越南。搶掠西喇古兒番族。屢行驅逐。抗不受命。思克遣官兵於半箇山地方擊之。陣斬甚多。餘衆敗遁。邊境益清。三十年。有出使西域官於嘉

峪關外。爲番目阿氣勞藏。糾合套番。合氣勞藏。要劫。殺傷迎護官兵。思克夜發援兵。親從風雪。中率兵策應。賊番懼罪。返差官。思克以其劫犯。天使進兵蕩勦。以昭。

國典。從黑山兒湖地方。直搗番巢。斬數百人。疏入。聖心嘉悅。勅分首從治罪。其時阿氣勞藏業已遠遁。思克遣官赴西海。著落番目衆台吉。追賠擒解。各按其罪。衆台吉凜法。追繳原搶什物。願思寬宥。思克具狀以聞。奉。

旨依議。七月。敘功紀錄一次。三十年。思克條議。肅州宜設總兵官一員。兵三千名。官兵既多。不患分佈。堵勦之不足。且總兵聲名尊重。軍威丕振。實足陰奪番回之膽。潛消窺伺。再於甘肅涼莊西寧。准令一例捐納。邊儲既裕。兵食有賴。無事則積貯倉廩。以備年荒賑饑之需。有事則糗糧既充。自無匱乏。既有益於邊防。又無妨於備賑。疏入。悉可其議。十一月。敘勦北套生番軍功。紀錄一次。三十一年四月。加太子少保。給一拜。他喇布。

勒哈番三十二年正月。加授振武將軍。三十五年正月。征噶爾丹。從寧夏出口。二月。總統綠旗官兵。五月。同撫遠大將軍費揚古。大兵進征。至昭莫多地方。大敗噶爾丹兵。奏捷。

聖祖遣官至營勞之。隨應

召回京。八月。途次懷來縣。遣官齎

賜團龍紗袍褂。綴東珠涼帽。腰帶靴襪。并

御製凱旋詩箋。以賜。詩曰。天討恭行日。軍威戰捷時。列

營張犄角。搃吮技有偏師。立見窮追盡。能承節制奇。鷹

揚資遠畧。宿望在西陲。抵京

陛見。

聖祖賜坐賜膳。深加慰問。因視平涼殺賊時所中臂傷。

驚訝久之。思克以年老乞休。弗允。九月。

特賜御書雄鎮秦關扁一。綏懷堂內製龍扁一。又於

暢春苑龍舟召宴。

命隨征士卒校射。又

賜宴。賜金。賜遊景山。其餘賞賚無算。及回汛。遣內大臣

領侍衛餞於郊。尋奉

旨。赴甘肅防備。三十六年春。遣使

賜鶯黃色團龍皮襖。貂皮褂。各一襲。三十七年七月。敘

勦滅厄魯特功。給拖沙喇哈番世職。九月。

恩詔加一級。三十八年五月。乞休。弗允。三十九年正月。

病劇。具疏辭職。奉

旨。遣御醫赴甘肅調治。醫未至。疾卒。時二月十六日也。

隨遣官祭奠。七月。櫬還京。

賜祭。賜鞍馬四匹。銀一千兩。尋又

賜祭銀七十五兩。葬銀八百二十五兩。追贈太子太保。

諡襄武。加授一等阿思哈尼哈番。兼一拖沙喇

哈番世職。子承運襲。其牛彙章京世職。以子承

恩襲。四十三年三月。

御製賜瑩碑文曰。在昔先后哲王。撫有方夏。永建乃家。

則亦有熊羆之士。不二心之臣。保輯疆圉。以藩王室。

維時懋哉。朕丕承天祐。統無疆大曆服。惟稽古崇德。

祐賢。建侯樹屏。以保世於滋大。爾有猷有爲。克勤於

職。舊有令聞。式用懋簡。畀爾秉鉞於涼州。爾迺踐修

厥猷。無替朕命。俾西河黑水。奠厥攸居。無昏戕虐。惟

爾之能。惟十有三祀。蠢爾滇荆。敢行搆亂。有大難於西土。西土人亦弗靖。嗚呼難哉。惟爾懋德。克篤忠貞。一乃心力。服勞王家。用底定我西夏。追配於前人。予嘉乃績。曰篤不忘。庸建爾於湟中。董茲西土。惟朕作民父母。無有遠邇。昏我蒸民。一夫不獲。朕心攸困。弗敢康寧。於時噶碩弗率。昏迷不恭。或昏壽張爲幻。反拂我中邦。朕將天命明威。不敢赦。張皇六師。用致天之罰於爾丹。汝善敷乃甲冑。峙乃糗糧。於荒郊。弗迓克奔。罪人黜伏。肆朕誕以爾多士。殄殲乃讐。爾克迪

果毅。以登乃績。惟良顯哉。用賚爾秬鬯弓矢。俾徃蒞爾任。爾身在外。乃心罔不在王室。胡天弗恤。厥疾不瘳。人之云奄。朕心無以懌。嗚呼。爾功加於時。德垂後裔。名之曰襄武。以彰汝之績。禮亦宜之。紀功崇德。以勒貞石。終有辭於永世。則亦有無窮之聞。厥惟休哉。

其後
四十年甘涼二州皆請崇祀名宦子承運襲阿思
哈尼哈番尚

聖祖第九女和碩公主承恩襲牛录章京世職以皇孫女降焉今任散秩大臣

徐治都。漢軍正白旗人。世居遼東瀋陽地方。初任旗員。屢有勞績。順治十四年五月。任牛象章京。七月。協理甲喇章京事。康熙七年正月。以都督僉事階。陞任直隸天津鎮總兵官。八年。捐賑饑民有功。奉

旨。調補湖廣彝陵鎮總兵官。十二年十二月。逆藩吳三桂反於雲南。貴州文武降賊。十三年春正月。賊兵犯湖南。治都奉

聖祖仁皇帝旨。赴援常德。旋聞四川文武官降賊。逆兵

東下。復奉

勅回彝陵。屢却賊兵。二月。以援常德守彝陵功。加授左都督。九月。協同滿漢官破叛鎮楊來嘉於南漳。十八年三月。陞湖廣提督。五月。疏陳川江險要。請率師進川。師次巫山。旱坪鋪。陣擒偽將軍王岐鳳等。恢復川東一帶。直抵重慶。尋奉

旨回彝陵。五月。疏請移駐荊州。七月。疏請設立五板船一百隻。令彝陵鎮胡世英統之。以備水路。自領官兵。偕襄陽鎮臣水陸並發。前赴歸州興安巴

東形勝之地。勦撫逆賊。得

旨。所用戰艦。督撫等委官速造。毋悞軍需。徐治都即偕
彝陵襄陽總兵官。赴歸州諸處討賊。勦撫並用。速奏
膚功。十一月。疏請調撫標官。及武昌漢陽各營官兵。
進勦蜀寇。奉

聖祖諭。將軍王進寶。統率官兵。於棧道險峻之地。屢敗
賊寇。直前恢復漢中。逆賊王屏藩。所部之賊。不及千
人。已經敗遁。今當逆賊敗奔震動之時。進定四川。最
爲重要。可如徐治都所請。令巡撫張朝珍。調標兵_{千人}。

併武昌漢陽營兵一千二百人。速行遣發。十九年正
月。偕巡撫楊茂勳等。勦川賊楊來嘉。二月。疏言。
臣等率兵至巫山縣。僞將軍楊來嘉等。擁衆拒
守。我兵擊敗之。乘勝長驅。於是月初一日。至夔
州。僞將軍劉之衛。率僞總兵瞿洪陞等出降。遂
復其城。又疏報。譚洪遣子僞左路將軍譚天祕。
齋辨明_脅。從疏。并繳到僞勅印牌劄官兵數目
文冊。本月十三日。譚洪率子姪及僞總兵譚地
晉。譚地升。詣軍門降。九月。譚洪復叛。夔州府民

變。治都領綠旗兵赴夔州進勦。十月同鎮安將軍都統噶爾漢領兵攻巫山戰捷。進取夔州。賊望風奔潰。遂復夔州。敗其偽總兵於錯開峽。殺溺賊衆無算。師旋往圍雲陽。二十年復率兵駐防夔州。二十二年正月。議敘川東功。加階四等。又加二等。二十七年六月。湖廣督標裁汰兵丁。夏包子名逢龍者。聚衆作亂。殺巡撫糧道等。據省城。破漢陽。犯德安。治都率官兵至應城縣。遇夏包子賊衆二千餘。奮力攻擊。陣斬偽副將二員。守備三員。把總一員。殺獲甚衆。隨駐師應城縣。夏包子親率賊衆萬餘圍攻應城。治都分兵內外夾擊。大敗之。賊奔德安。聞夏包子親率賊衆。駕舟至鯉魚澆地方。近岸駐劄。治都即遣叅將鄭興等往勦。鎗礮並發。賊船盡遭焚燬。餘賊來犯大營者。復擊走。陣斬及溺水死者四千餘人。生擒偽總兵一員。副將以下官員二十餘員。兵三百餘。賊首夏包子。僅以身免。七月十八日。武昌城內偽總兵胡耀乾。及偽文武官弁等。獻

城投降。差人賫獻偽軍師妖僧大原首級。並大元帥偽印一顆。總督巡撫叅將關防三顆。口稱逆首夏包子。戰敗之後。帶領餘賊逃回武昌。在城偽官弁等閉門不納。夏賊復行逃竄。其妻子家口俱已收繫城內。治都於十九日。帶領官兵入武昌府。安撫軍民。是時振武將軍瓦岱率禁旅自北來南。至武昌縣。餘賊聞風逃遁。瓦岱至黃州府。偽總兵趙得等於二十日獻城投降。有黃崗縣生員宜畏生等擒獻賊首夏包子。磔於軍前。武昌黃州府俱平。治都繕疏報捷。下部議敘。二十八年三月。兵部議覆。敘平楚逆夏包子功。授治都拖沙喇哈番世職。准帶孔雀翎。三十年閏五月。奉

旨。湖廣提督徐治都勞績茂著。孫思克。施琅。俱經授爲將軍職銜。徐治都亦應授將軍銜。隨經部覆。准授鎮平將軍。仍管提督事。三十六年卒。年六十七。

予祭葬如典禮。

贈太子少保。諡襄毅。

馬寧。漢軍正白旗人。原係明朝陝西副將。順治二年正月。大兵征陝西。寧率眾投誠。四月。英親王阿濟格。委寧署鳳翔府中協副將。三年七月。陝西總督孟喬芳。委寧署寧夏中協副將。檄隨寧夏總兵官劉芳名。赴秦鞫賊。時賊渠王元。馬德。據寧夏作亂。寧同劉總兵馳回寧夏。解散叛黨。安撫人民。八月。領兵擒斬叛逆王元。十月。至同心城。擒斬叛逆洪大誥。十二月。入南山。掏兒河。勦殺巨寇胡向宸。四年七月。於沙泉子擒斬賊首李大殿。河兒坪擒斬叛逆馬德。十月。調署督標中軍副將。十二月。在南山擦陡崖。擒斬賊首傅三。金龍。掃其巢穴。五年正月。領兵赴秦鞫。招撫惠總兵標下叛卒三千人。擒獲首惡季茂榮等五人。梟斬之。三月。河西逆猓米喇印等倡亂。甘肅一帶。涼州莊浪。蘭河。洮岷。猓賊數萬。攻圍鞏昌府。閏四月。寧領輕騎一千人往勦。行至寧遠縣廣路坡。遇賊。寧首先衝陣。連破七營。追殺七十里。鞏昌重圍立解。按察以下官四十

餘員得全無恙。殺賊萬餘。殘孽潰散。復從馬家河進取內官營。攻擊三晝夜。城下擒賊首李六斬之。恢復內官營。連夜進金縣。與偽總兵丁國棟副將馬兆麟大戰。寧身被三創。奮勇鏖戰。從辰至未。殺敗猓賊。追襲五十里。至猪嘴地方。收兵。獲偽銅印四顆。偽劄付四十張。恢復金縣。五月。三路合兵殺賊。賊大敗。渡黃河。恢復蘭州。復偕昂邦章京傅夸蟾攻取河州。斬殺照壁山巔猓賊三千餘人。直抵河州城。猓賊閉城死拒。寧領兵晝夜攻戰。凡六十日。相機勦撫。恢復河州。七月。寧同滿洲戶部侍郎額色渡河。恢復莊浪。八月。實授陝西督標中軍副將。六年正月。率兵攻甘州城西門。左手中箭。仍奮勇登城。殺敗猓賊。平定甘州。總督孟喬芳因晉寇猖獗。回兵救援。檄寧總統官兵。攻取肅州一帶城堡。三月。寧領兵攻擊肅州城。猓賊四門並出迎戰。從辰至申。賊敗退。閉門不出。寧派兵圍困。至五月。賊啟門牧馬。以誘我兵。寧乘機四面衝殺。斬禕斬大頭

目他什爛等三百餘人。六月。獯賊暗約哈密國。纏頭獯子。分六路入寇嘉峪關。以救肅州。寧遣兵至關外迎敵。夤夜大戰。陣斬百餘人。殘孽逃回哈密。十一月。獯賊拒城負固。寧分佈官兵。攻陷東面城。與獯賊城頭對壘。十晝夜。斬獲偽王子土倫太。大頭目虎北風等十級。殄滅五種。番獯生擒元克丁國棟黑二。恢復肅州等處。寧勞瘁八閱月。河西悉定。旋師獻俘。至西安府。奉旨。將二逆梟首。遊示三邊。敘功。授署都督同知。八年六

月。領兵勦陝西宜君山賊。生擒賊首劉宏才。九年三月。殺敗賊衆。生擒賊首雷學鎮。梁鎮虎。九月。定西將軍固山額真侯墨爾根轄密疏奏准。以都督同知馬寧陞授勦撫四川右路鎮總兵官。隸屬固山標下。十月。領兵入川。時因羣寇潛伏。寧捐貲造盔甲弓矢。募勇士以待戰。十一年。軍政考察卓異。

欽賜鞍馬弓箭。十四年七月。駐防達州。解散偽總兵符秩兵三千人歸農。追獲偽劄偽印。十五年三月。

統兵隨定西將軍墨爾根轄。恢復重慶。四月。進
取遵義等處。六月。追襲偽寧國侯。自天心橋。由
羊腸陡嶺。徒步督戰。斬級擐旗。大獲全勝。逆賊
黃夜潛逃。八月。調防梓潼縣。是時定西將軍固
山額真侯墨爾根轄。卒於軍。寧於十一月。統兵
隨吳三桂。由水西天生橋進征。十六年正月。隨
大兵取雲南城。駐防富民縣。二月。統兵由迤西
進取楚雄大理蒙化等府。招撫麗江等府。三月。
追襲偽桂王李定國。遠逃緬國。遂取永昌府騰
越州等處。三月。駐防賓川州。撫綏殘黎。四月。在
雞足山。擒故明黔國公沐天波。廢襲長子沐忠
亮。解赴軍前。五月。騰越州偽伯楊武倡亂。寧移
駐大理府。防守迤西州郡。宣佈

聖恩。招出偽敘國公馬維興。淮國公馬寶。偽將軍李貴。

賀天雲。焦洪。曹塔。莘策。曹福德。偽都督彭順。張
喜。偽漢陽王藩。下都督李登。字單茂。秦。偽總兵
副參江瓊。余子方等官。一百六十四員。兵丁男
婦二萬有奇。繳金銀銅印三十六顆。偽勅一十

九道偽劄一百五十二張。引官兵赴軍前投見。安揀北勝州。隨宜錄用。六月。由麗江招出偽公安伯李如碧。偽宜川伯高起龍。偽鎮朔後將軍劉鎮國。偽威平營都督王朝欽。偽總兵副參顧進陞。余應俸。蔡德春。韓芳先等。官兵男婦二萬有奇。俱薙髮歸誠。遣官引赴大軍投見。復領赴省城。親繳偽勅印關防劄付。安揀陸涼衛。彌勒州。羅平州。三處駐劄。以備錄用。是年軍政考察卓異。

欽賜蟒袍。十二月。加授右都督。十七年十月。改雲南。撥勦前鎮總兵官。駐防大理府。十八年正月。移駐卯。傳集土官。詢問偽桂王。李定國。白文選等所在。悉無確據。乃遣官高尚乾。赴緬國阿娃城下偵探。得之。九月。總統各鎮營官兵。隨定西將軍愛星阿。由姚關出邊。進伐緬國。十一月初九日。至木邦。擒偽鞏昌王。白文選。標下偽副將馮國恩等五人。究得敵情。迺由孟右之路。錫波渡河。暗襲白文選。率兵分路。晝夜行一百七十八里。是

月二十五日。招撫偽鞏昌王白文選等官兵男婦一萬一千有奇。象十三隻。康熙元年三月。回汛奉

旨。加授左都督。二年。考滿自陳。奉

旨。准照舊供職。賜羊酒表裏。三年二月。領兵隨吳三桂進征水西。三月。在果勇底與賊大戰。斬級無算。

四月。領兵至誇木箐。初八日。總統各旗鎮官兵。至比納。鳳凰箐。老牛烏種。硯。俱勒殺苗賊。又攻毛梨園。路砍。硯。猛額。硯。恪波。羅。硯。阿木箐。天生

橋。挖布。硯等處。屢破斬苗衆。五月。記功二次。六月。統領本標官兵。并義勇左營官兵。攻水西杓裏。分兵五路。會合劫關。擒獲逆目賊衆。七月。總統六鎮營官兵。進勦隴勝等處。分兵由智都。水柳堡。董猴場等處。八路進勦。八月十三日。於隴勝齊集。擒獲逆目馬庸等十五人。九月。總統八鎮官兵。駐劄米裸佈。遣本標官兵於歸集箐內。擒獲偽國師張默。大頭目功貴。扯周詩。獲功貴。扯銀印一顆。十一月。密遣本標官兵。赴貴州新

添衛十萬溪。擒獲偽黔陽王皮熊。十二月。分遣各鎮官兵窮追十五晝夜。道經十七戰。斬關奪險。追至法地壘。陣擒逆酋安坤。獲宣慰司印一顆。偽總兵張鵬。共擒附從大逆目糯縱等十二人。四年正月。總統八鎮營官兵。搜勦水西逆目安如鼎。追三日夜。至雄捕山。安如鼎受擒。十一日。遣官兵進勦晚泥。白歹。姑烏。姑你黑。又探厨石挖等洞。攻勦九箐。陣擒逆目者業。阿者。阿戶。于卓。四人。卽駐白草河。出示勸諭。招撫逆目祿萬鍾等二百二十人。苗衆夷獯五千餘人。各給賞花紅銀牌衣帽。三月。水西勦撫事竣。獻俘。旋兵交水。羽檄調往寧州救援。晝夜奔馳。至四月初五日。進勦竹子山。殺敗獯賊。初七日。抵寧州。初八日。進勦登樓山。追至大西山。隴箐馬耳山。陣擒偽二總督李全。偽總兵李忠。及祿酋之族祿天壽。祿永庚。祿長庚。逆目鄭玉林等。至普蚌山。擒獲偽總督馮道生。五月。進勦喬甸龍洞。陣擒逆目阿勒。李德。李從。辛老四。王三。撤兵回汛。

七月。征勦迤東反首祿昌賢等。八月。進勦老寨
簸剝。楊柳河。老寨等處。陣斬賊兵阿勝者。烏白。
阿雄。王得。生擒賊首白縱。阿七。又攻取烏溪石
峒。王弄山。鎖狸城。硎。教化大箐。追勦龍元慶等
逆苗。凡五戰。皆敗之。十月。統領各鎮營官兵。勦
捕反首祿昌賢。李茂林。李六九。抵溪楮山。三岔
河。慢老江底。分遣官兵三路追擊。連夜渡江。大
破賊營。生擒偽黔國沐坤元。及祿昌賢女壻張
鈺。姊壻楊三元。十四日。在龍蔭山陣斬祿昌賢。
生擒其子祿通。復親統各鎮官兵。進勦安邊。江
邊。猛撒啞得白。阿別簸。稍。陣斬李茂林父子二
人。擒逆首李六九。李伯牛。李伯二。李伯三。十一
月。凱還。五年。烏撒女首隴氏叛。寧領兵由木達
路分四路並進。歷五十三日。經九戰。搜勦十二
箐。攻克二硎。陣斬逆目泚處等三人。陣斬逆目
九人。五月。總統各鎮兵馬。分兩路進勦。至彝倫
箐。普堵箐。陣斬郎岱。及逆目阿罵。阿細。區草。阿
豆。隴安。藩。八月。總統六鎮營官兵。分三路進勦。

龍洞阿他。黑拍着。女姑施額。千雪額。色馬剛寨。法泥。教卜得。搗碓。勒彝。烏拖。烏底。果則。果擺。賽寡。連搜。十四大箐。經七戰。陣擒逆目二十九人。前後共記功十五次。紀錄一次。以記功八次。給一拖沙喇哈番。西南用兵立功者多。而始終其事者無若寧。故備著焉。十一年正月。駐防麗江府金沙江。二月。領兵在橋頭擊蒙番。敗之。蒙番黃夜渡江逃遁。九月。駐防麗江府地喇普。他成。其琮。巨甸。石鼓。十二月。遷湖廣提督。十二年十

月。調山東提督。十二月。奉旨。召入京。十三年正月。加太子太保。賜盔甲鞍馬撒袋貂褂皮褥帳房駱駝等物。奉旨。隨順承郡王往征叛逆吳三桂。十九年九月。疾卒。諭祭葬如典禮。

楊宗仁。字天爵。漢軍正白旗人。贈光祿大夫楊朝正長子也。生而穎異。幼時舉止若成人。比長。隨父讀書。留心吏治。性至孝。非奉親命。未嘗離子舍。康熙三十五年。父使之仕。乃謁選。得楚慈。

利知縣。慈利邑於叢山。密邇苗夷。民頑地瘠。官
解在榛莽中。宗仁曰。是可行吾志矣。地瘠上無
苛求。民頑可施教化。爰勸農桑。興學校。民知力
田。孝弟。向風喁喁。有爭訟者。牒投入。卽召至庭。
片言立折。民咸愛戴。稱神君焉。閱五年。調衡州。
藍山縣。藍山爲楚粵苗漢接壤。邑稱難治。會八
排梗化。楚帥率師援勦。道由臨武。臨武官吏懼
擾。賄帥取道藍山。迂迴險阻。士卒有怨言。而帥
素鷙悍。失衆心。比師入境。宗仁備牛酒郊勞。見
其將虐兵驕。竊恐有變。預爲備。詰朝果大譟。控
弦豎幟。踞山而囂。宗仁單騎往。諭以利害。衆心
稍釋。曰。公言良是。但鼓譟有罪。難束手就死。能
令本帥給文爲據。則惟公命。宗仁知衆疑難釋
也。曰。是在我。詣帥語以故。立書不鼓譟。文牒鈐
以印。付首事四人。遂各歸伍。事定。宗仁諭兵衆
曰。印文固足據。恐自操左券。異時究詰。罪有歸。
衆爽然曰。復何以解。宗仁曰。繳文卽無患。衆俛
首聽命。倉猝間。大鬪立弭。宗仁力也。隣邑盜劫

殺人鍛練成獄十餘人定大辟。

聖祖仁皇帝命覆讞。撫臣以牘屬宗仁。閱未竟。得其情。讐殺非盜殺也。渠魁二人服辜。餘盡釋。其明允類如此。三年計典。巡撫趙申喬薦舉卓異。擢階州知州。階地生羌出沒。白晝眩篋。行旅病之。宗仁至。連堡寨。謹斥堠。豪羌斂跡。未幾遷臨洮府同知。監蘭州權稅。值歲歉。流離載道。請發倉廩以賑饑黎。寬歲額以通商賈。招流亡以實戶口。大吏知其賢。悉從所請。州多盜。惟老瓜賊尤桀

點難治。宗仁嘗奉檄覆讞他獄。鈎距摘伏。旁發老瓜賊至百餘案。曰此雍梁間大患也。不治民害益熾。窮治之。則有司罹諱盜之譴。乃取百餘事實串爲十案。悉寘諸法。由是盜風寢息。有司亦獲善全。最聞。旋擢本府知府。率屬安民。治績尤著。尋擢西寧道。西寧爲西陲要衝。宗仁振頽剔弊。賢聲遠播。公卿交章薦。遷浙江按察使。下車。墨吏聞風避去。豪右大猾屏息不敢喘。明刑弼教。兩浙無冤民。會父卒於署。宗仁扶櫬行百

姓攀留者。填塞街巷。服闋起。補廣西按察使。未至。旋奉

命署理巡撫。抵任五日。卽特授廣東巡撫。在任五載。潔已率屬。政令所加。風行草偃。粵爲盜藪。至是望風屏跡。四境以寧。雍正元年。

特授湖廣總督。是時宗仁弟宗義爲河南巡撫。母就養河南。以疾終。宗仁方赴楚。旅次聞母喪。牒知當事。策騎奔赴。偕弟治喪。比奉旨。在任守制。宗仁始奉

命至湖廣。首劾大員。發贓數十萬。屬吏戰慄。乃從容化導之。禁餽遺。減耗羨。革醴商陋規。除無名權稅。興利除弊。法在必行。築隄禦水患。散賑救荒。夙夜籌畫。無一刻少懈。久之。疾作。

上聞。遣醫馳驛治療。病間。猶強起視事。又以宗仁勤勞夙著。正直不阿。晉秩太子少傅。三年七月十八日卒。遺疏入。

特降勅旨褒諭。言楊宗仁敬慎持躬。廉能供職。効力年久。懋著勤勞。簡任總督以來。潔已奉公。孤介端方。始

終一節。忽聞溘逝。朕追念良臣。深為悽惻。難釋於懷。應沛特恩。以示優眷。加贈少保。並給拜他喇布勒哈。番。與其長孫重毅承襲。准襲二次。尋部議卹典。奉旨。賜諡清端。給全祭葬。建碑於墓。文曰。國家分職宣猷。特重保釐之寄。飾終養舊。用嘉篤棊之忱。其有才守兼優。靖共素勵。荷絲綸之褒寵。宜琬琰之垂光。爾楊宗仁。操履方嚴。服官勤恪。播循聲於州縣。旋縮郡符。紀治行於監司。俄遷觀察。受殊知於聖祖。聖祖。俾鎮撫於粵東。譽望久彰。廉能夙著。朕念荆襄之要地。特昇節制之重權。亮節清風。樹表坊於僚屬。振綱飭紀。能綏靖於軍民。爰晉宮傳之階。方懋旬宣之績。良臣忽逝。軫念難忘。賜世爵以延恩。命親王而致奠。孤卿優贈。祭醊加頒。曰清曰端。用旌懿行。於戲。名留竹帛。遡品槩以如存。榮被松楸。緬賢勞而增感。風於有位。視此豐碑。



竹青如野北豐與

留竹青如野北豐與

真亦如野北豐與

真亦如野北豐與

真亦如野北豐與

真亦如野北豐與



